

四庫全書

史部

欽定四庫全書

史部

硃批諭旨卷一百三十四至
七

臣 永瑤 恭校

編修 臣 裴謙覆勘

總校官中書 臣 朱 鈐

校對官中書 臣 徐步雲

謄錄舉人 臣 徐元扆

欽定四庫全書

硃批諭旨卷一百三十四

硃批焦祈年奏摺

雍正八年十月初九日廣東觀風整俗使臣焦祈

年謹

奏為感荷

聖恩敬陳下悃仰懇

睿鑒事竊臣一介庸愚蒙

皇上天恩疊加擢用授為廣東觀風整俗使臣何人斯受

恩優渥清夜自思捐糜未報茲復蒙

天恩命大學士公臣馬爾賽等寄信責臣令臣恪遵

聖訓毋負

皇上深加任用之至意臣捧讀之下愧感交集銘心鏤

骨夙夜服膺若此後稍有懈怠稍有罔念不但仰

負

聖主顧復之隆恩罪固難逭亦斷不能自容於

高天厚地之中倖逃鑒觀之譴責也惟有冰兢自矢時

時以虛心存心和衷濟事以期仰酬

聖恩於萬一耳所有微臣感激下悃謹繕摺陳

奏伏乞

皇上睿鑒謹

奏

空言無益實力遵承見之於行事方好

同日又

奏為酌修塘汎之費仰懇

睿鑒事竊查廣東各營塘汎設有兵房煙墩礮臺所以保障地方安弁兵而資守望但每經風雨損壞不無坍塌則修葺之舉自不容緩查此項修葺之費例無開銷間有一二州縣捐修者大抵皆派之里民邇來州縣中之私派等弊嚴行革除只此修理塘汎一項尚不免派累殊違我

皇上愛兵愛民多方蠲恤之至意以臣愚見合無將廣東辭謝每年約正值月之廩餼銀兩均勻酌給令督撫提鎮各飭該汛弁會同該地方官詳查估計修葺堅固定以年限按期修整其邊海處所風信靡常易至損壞者不在限年修理之列文武該管上司嚴加核査如有仍前廢弛等弊及該管官不行揭報并加叅處如此則汛房墩臺在在整頓弁兵之防禦得所民間毫無擾累矣是否可採伏祈

皇上睿鑒施行謹

奏

此當言之該督撫者辭謝廩餼銀兩為數幾何焉能數
用似此沽譽之舉少不慎密悔吝隨之矣誌之莫貽後
憾

雍正九年三月初一日廣東觀風整俗使臣焦祈
年謹

奏為密奏事竊臣准督臣郝玉麟咨開准部議該督

將東省硝觔欲召募殷商雇工設爐採買鹽土淋煎磺觔將鉛沙用確熬煎庶免隣省輓運不致腳價繁多等語但硝磺等項軍務必需關係綦重若召商設爐煎熬不便據咨遽議應令該督具題到日再議等因臣不揣冒昧竊以為東省硝磺向在廣西湖廣地方採買久有成例今督臣籌及腳價繁多飭行查議據詳欲於廣州小東門外設爐五十口募商雇工給價採買鹽土淋煎硝觔以供營

伍之用非不便易第每爐一口需用工匠十餘人計爐五十口約用五百餘人又加以挑運鹽土絡繹往來總計不下千餘人此內恐未必皆係土著良民人多則易於滋事類雜尤易於藏姦雖委員督理稽查保無有貽害地方之處至於礪觔又云據廣韶二府詳稱仁化等處現出鉛砂若用礪熬煎亦易成省力因欲委員前至該地動給公用銀兩雇募煙民煎取陸續運歸官局夫仁化一帶地

方與湖廣廣西接壤民徭雜處最易藏姦今若令煎磺之輩屯聚其中則日聚日多勢必有外來流匪影借潛藏勾引不法等弊不止於干礙民間田園廬墓而已又督臣慮及從前奉差員役或額外夾帶沿途私賣若本省就近熬煎較之外省買運諸弊可杜臣以為鄰境採買人員縱有不肖營私其弊猶易杜絕如本地開煎或兵役交通或姦徒接運外省私販皆得乘機盜買分往各處售賣而

附近猺狼匪徒亦難保其無偷買私製火藥為害
地方之處查從前原設有硝爐五十座因姦商販
賣無忌接濟盜賊是以康熙二十四年間奉准部
文行令禁止在案是當日停煎已熟悉其情形則
今日議開不可不預籌其利害以臣愚見仍照舊
例向鄰省採運為便為此密摺陳

奏伏祈

皇上睿鑒施行謹

奏

戶部密議具奏

雍正九年六月二十九日廣東觀風整俗使

臣焦

祈年謹

奏為密奏事竊

臣

查潮州府之饒平縣地處東偏與

福省之詔安縣緊接負山帶海宵小易於潛蹤

臣

莅任後見該縣竊刦之案疊疊幾經嚴飭加意巡

防多方躡緝

臣

訪得有詔安縣窩棍黃五舍者倚

恃世族慣藏姦匪勾通饒邑之武舉俞猷狼狽作姦凡有竊刦多攜賊遁至福建省銷賣驟難弋獲更交結吏役練捕人等每遇事輒通同隱却實為地方積棍為害隣境匪淺查俞猷已於鄭汝式等案内因窩藏盜牛賊犯現經革去武舉枷責發落在案而隔屬之黃五舍經移明福建省地方官嚴行查究去後及臣親至饒平之黃岡細加訪察竝密詢黃岡副將焦應林據云迄今仍然窩匪作姦似此

能如是秉公懲惡不分彼疆此界惟力是視毫無瞻顧
豪惡肆行犬牙交錯之邊境實難姑縱伏懇
朕甚嘉悅外省大員咸似汝如此居心朕無慮矣
皇上諭令福省督撫嚴查黃五舍窩匪積案拏究定擬

以清盜源以靖地方者也謹據實密

奏伏祈

皇上睿鑒施行謹

奏

諭劉世明阿爾賽趙國麟汝等職任封疆平時閉塞耳目並不留心察緝匪類及至隣省移咨照會又不盡力

查究未知汝等是何心行具何面皮也今接朕諭若復漠視不加意訪究懲治或從而粉飾欺隱及反行開脫亦任汝等為之耳

同日又

奏為密奏事竊廣東各處山場歷有礦徒聚族私挖
屢奉

諭旨查禁年來該地文武官弁欽遵奉行漸次寧謐臣
前於本年春間訪聞惠州府和平縣有礦徒八十

餘人欲往湖廣之桂東縣創礦臣以聚衆越境恐

滋事端當即咨會督撫並飭該地方文武嚴查分

別發落押解管束在案又訪聞廣西梧州府懷集

縣地方礦場現在開採聚集人衆至於數千臣以

懷集地方與廣東山連水接礦徒趨利如鶩恐致

越境潛往當經咨會督撫並密飭各該地方文武

官弁於兩廣水陸隘口處所嚴行查察亦在案今

臣於五月二十一日旋臣駐劄衙門接到督撫密

咨內開大學士奉

旨寄信湖廣桂東等處停止採礦著廣東督撫查禁越境礦徒毋使流散生事仰見我

皇上睿慮周詳防微杜漸當經密飭嚴查多方曉諭謹將從前訪聞查禁之處據實具

奏以仰慰

皇上寧人息事之至意謹

奏

覽

粵東礦廠除嚴禁之外無二議也實力訪察禁約毋懈
倘地方有司有貪利故縱者當嚴叅示警至於隣省開
採之處無依小民偶或越境謀食又當一論該省之不
宜開採蓋緣米價昂貴盜案每繁之故不然何疎於湖
廣廣西而獨嚴於粵東耶將此意隨便令粵省官民知
之假使粵東民俗一旦捨耒耜本盡力耕耘至米糧充
盈盜風寢息時礦沙乃天地自然之利亦何靳而不令

金匱要略卷之十四
為之也若以目前土俗人情而欲望開礦謀食斷不允行者

同日又

奏為據實密奏事竊

臣蒙

皇上天恩優渥疊加擢用前曾於恭請

聖諭之日跪聆

天語諄諄以廣東從前樹黨積習

諭臣嗣於雍正八年十月初八日欽奉

上諭厯念粵東文武不和令臣留心稽察臣跪誦之下

時切凜遵伏惟臣抵任以來今逾一載每留心體

察從前積習

皇上聖明燭照力破黨援及上年冬間祇承

諭旨之後大小臣工交相警惕爭自濯磨多以懷私干

咎為懼是邇年來粵東官常悉賴我

皇上天地父母開誠化導之深恩可以仰慰

聖懷遠注之至意至臣去年巡歷肇高雷瓊等府地方

今年春夏巡歷惠潮等府地方惠潮兩府風俗素稱刁悍今所至詞狀簡少連歲豐收米價平減民皆樂業遠至南澳碣石之海島邊疆總屬寧謐臣謹據巡歷情形一併奏

聞謹

奏

據奏粵東官常民俗朕疑信相半歷觀外吏大都於初到時必過言地方之廢弛及稍遲歲月必極言風習之

整理每每皆然覽之厭矣何能慰朕遠注之懷但當一秉忠誠竭力勉為之何在於言論章奏間耶地方情形果如所奏不但朕必知必聞天下人耳目自不可掩毋因一府一縣少有可觀及或誤聽誑辭聞見不真遂視全省為已治已安而生懈弛之念也

同日又

奏為奏

聞事竊臣查韶州府英德乳源等縣逼近徭峯重巒深

谷素稱宵匪藏姦之地前英德令陳志儀弭盜無方因循諱飾以致多有竊刦之案業經會疏

題叅查該地各案多係柳坑猺賊為害經撫臣委令曲江乳源二縣協拏臣咨會密檄以猺獍為盜宜相機設法購緝不得妄拏滋擾時乳源曲江二令親帶練役裹糧入山如法躡緝已據陸續拏獲猺賊鄧進寶盤雲才等二十餘人起出贓物俱經各事主認明給領其餘盜或自行投首或別猺縛獻

除該員確審分案究擬聽候督撫二臣會

題外緣係徭崗盜夥今經拏獲各處徭山俱屬寧謐

理合據實奏

聞謹

奏

緝捕有方自無滋擾辦理可謂是當

雍正九年十月二十一日廣東觀風整俗使

臣焦

祈年謹

奏為奏

聞事竊廣州市會之地五方雜處易於蔽姦臣不時嚴飭南番二縣並城守營曉夜巡查茲於九月間有湖廣差官毛峻德外委把總劉成後齎奉督臣邁柱密票稟稱有行劫江西官署案內盜犯沈二解至湖廣孝感縣楊店地方脫逃奉

旨嚴拏令特一路蹤跡前來懇即添差查拏等語城守副將毛克明當即密令千把目兵並該縣捕壯同

來差四路截緝當將沈二獲住并獲隨從二人一
名王廷魁一名宋二鎖子起出衣飾各贓逐一登
記明白稟報前來經會同督撫飭令番禺縣訊供
據沈二將行劫江西官署後解至湖廣地方脫逃
直認不諱其王廷魁供係雇來煮飯宋二鎖子供
稱賣身跟隨除現將沈二等三人並起出各贓點
交來差一面多撥兵役小心護送遞解外事關拏
獲隣省大盜合行奏

聞謹

奏

此案盜犯之緝獲殊屬可嘉有旨諭部

同日又

奏為據實奏

聞仰祈

睿鑒事竊查廣東州縣地方緊要巡檢三十三缺前曾

准部議比照州縣繁簡調補之例於通省雜職內

選才能強壯之員調補如果巡緝三年並無盜案
准其即陞業經遵行在案查有廣州府番禺縣茨
塘司巡檢李藻才力強幹一切查姦緝匪不遺餘
力地方寧謐督臣

題請陞補縣丞因格於部議仍留該司供職又有潮
州府惠來縣葵潭司巡檢黃繩中才具敏練殫力
查緝宵小屏跡該府以饒平縣之黃岡司密邇福
省盜賊易於蔽姦曾將該巡檢詳請調補亦在案

臣思巡檢一官專司捕緝查察地方最為緊要廣
東山海交錯之區既當嚴行甄別以專責成更宜
格外獎賞以示鼓勵今李藻黃繩中實係才識兼
優之能員所轄地方卓有成效臣體察既實不敢
壅於上

聞倘蒙

皇上天恩不拘資格特加擢用以展其才

敕諭督撫咨部引

見凡在微員益當感激鼓舞勉圖報稱矣為此據實具
奏伏祈

皇上睿鑒施行謹

奏

有旨諭督撫二臣矣汝亦將曾經奏朕之處更面言之
雍正十年二月二十八日廣東觀風整俗使臣焦
祈年謹

奏為奏

聞事竊照廣東地方今春正二兩月雨水霑足正值春耕之候得此膏雨時沛高下原隰咸皆以次蒔插將來可卜豐收粵東二麥甚蚤此時皆已茂秀春間米糧每石價銀六七八錢不等其產穀最少之州縣間有價至一兩者至於各鎮協營遊巡駐防凡一切查緝事宜應與該地方文武協理之處俱各以時具報近來盜賊亦漸稀少地方寧謐理合繕摺奏

聞謹

奏

粵東雨水米價情形以手加額覽焉

同日又

奏為奏

聞事竊查匪犯俞猷與福省詔安縣黃五舍朋謀作姦

臣前訪察確實業已摺

奏詎俞猷梟性不悛於去年九月間糾黨歛血拜盟

種種不法經黃岡協暨饒平縣拏獲並匪黨陳阿
幼等犯押解來省質訊之下供招結黨拜把謀為
不軌歷歷不諱又據俞猊供稱八月十五日下午
曾到福建下葛墟黃五舍家商量報讐的事要他
招些人來幫我黃五舍說我這裏容易那江歆也
可以招得約定九月十三夜在青峯山會齊打搶
潮州府城不想黃五舍被福建上司拏去了他留
下話與黃加皮黃亦寬黃金說如俞猊來要人你

等可約些人去小的又約九月二十三日在南門外會齊後因海陽縣訪知都拏去了等語隨經會同督撫咨提黃五舍前來經藩臬兩司道府在於撫臣署內分別質訊據黃五舍將俞猷所供之處俱各一一招認臣思俞猷黃五舍二犯雖一在潮州饒平縣一在漳州詔安縣但適當閩粵交接之地呼吸相通從前窩盜窩贓既已無所不為今又包藏禍心招人歆血拜把圖謀為匪現在供認確

鑿不亟剪除將來海疆重地貽害匪淺除現在移
咨會提供出之黃加皮黃亦寬黃金到案嚴訊幫
人約會實情另行奏

聞外所有提到黃五舍供認招黨謀匪實情理合具

奏伏祈

皇上睿鑒施行謹

奏

事關糾黨圖謀為匪務須徹底嚴究毋得草率完結

雍正十年五月二十九日廣東觀風整俗使臣焦
祈年謹

奏為奏

聞事竊照廣東入夏以來五風十雨極其調順目下各
屬早稻茂秀旬日之間即可登場蓋粵地五月天
氣每慮雨水連綿曠日不雨又慮苗乾今恰得隔
日即雨一雨便晴真所謂雨暘時若也聞廣西雨
水頗多自梧州而東下流入三江一帶廣州之南

海三水等縣肇慶之四會開建等縣地多基圍而勢當西水之衝今年西水頻發而隨長隨消各處基圍保固無虞五月內各屬報到米價較三月更加平減人民樂業近聞科臣徐杞巡查惠潮兩府山場如惠屬之博羅永安歸善等縣有名鍋底山鳳凰嶂等處衆山綿亘係歷來隴口最多礦徒出沒之數今隴口俱經封塞多有青草長平非同時開時閉之形邇來礦徒實屬斂戢稀少目下因大

官田新設鶴山縣一帶地方查其可墾之荒田甚多現與督臣撫臣議商招集惠潮各屬無業之民安插耕種俟科臣回省與督撫會議酌定奏

聞際此時和年豐皆蒙

皇上洪福廣被澤遍海疆臣等身任地方之責務期人有利賴俗盡還淳以仰副

聖天子教養斯民之至意為此具摺奏

聞謹

奏

以手加額覽之

雍正十年八月十九日廣東觀風整俗使臣焦祈

年謹

奏為奏

聞事竊照香山縣屬淇澳麻子二村因其獨處海中居民每多為盜經督撫與臣訪知各犯姓名委員並檄飭該縣協按名密拏當經現獲羅象茂等三十

餘名自行投首歐陽德輝等四十名現在分別究結已經會同督撫合詞具

奏無庸瀆陳外再查新會新寧開平等縣交界之處有百峰山綿亘數百餘里向為盜藪急則直趨香山廣海寨一帶洋面往來飄忽剽奪時聞最為民害臣與督撫多方設法併密飭文武用心緝拏今據開平縣自行投首賊首李雅拱一名又廣海寨署遊擊馮元報稱擒獲胡椒四等九名又新寧縣

報稱首獲又脚三等四名又肇慶府稟據開平縣
張令陸續招到陳上滑等三十三名及新寧縣拏
獲鄺天遠等五名此數十名者俱係著名積盜非
尋常匪竊可比除有案者歸案究擬投首招致者
令其緝賊贖罪仍一面嚴飭該地方文武逐細搜
捕務使驅除淨盡不留餘孽以靖根株所有續獲
百峰山等處各盜緣由理合繕摺奏

聞謹

奏

據奏粵東積賊陸續首獲盜風漸次止息嘉悅覽焉勉之

同日又

奏為據實密奏事竊照廣東從前文武不和樹黨營私之積弊蒙

皇上洞察嚴加懲剔又

特頒諭旨遍行刊刻宣示勸戒近年以來督撫提鎮咸

以和衷相率而各屬員弁亦頗知凜遵懼蹈隕越
目下粵省局面實不比往年此臣之不敢壅於上
聞理合據實陳

奏者也抑

臣

猶有不敢隱諱密行奏

聞者如肇慶府陽江縣衙內偷盜餉銀該縣叅革知縣
邱慤隱諱不報濫拏無辜疊夾又復派紳衿貸償
經肇羅道張渠訪實飭肇慶府查究諱盜濫夾並
派償是真嗣肇羅道至省在巡撫官廳司道官員

會集之所按察司黃文煒倡言邱慤係湖北王巡撫特薦之人肇羅道此番嚴查邱令若罹叅革王巡撫當有降調處分同衆面責張巡道之非張渠荅云稽查盜案本巡道之責非為多事兩相爭論嗣經陞任撫臣鄂彌達將邱令會疏

題叅而司道之情形猶未釋然又高州府通判管復始委修海船事務該通判侵蝕船料銀兩經高雷廉道毛世榮查出詳揭詎高州府知府張兆鳳徇

情曲庇屢向該道求寬該道因將張兆鳳一併附
揭嗣道府先後至省按察司黃文煒設席衙內招
毛世榮飲酒勒與該府張兆鳳講和毛世榮云法
之所在理應揭叅原非為私情起見無庸和息按
察司厲色相加立促張兆鳳會飲而散又督臣通
飭文武嚴禁米穀私鹽出入口岸一案按察司黃
文煒直用文申飭提督語言過當以致提臣張漣
據文通咨又訪察得近來署督臣鄂彌達因臬司

行止乖張曾經面飭而黃文煒致生怨懟頗以為
言臣竊以為現今通省文武羣相砥礪漸化積習
臬司大員如此行徑恐生嫌疑之漸於粵東官方

所關匪輕臣受

皇上重恩不敢稍有欺隱為此據實密行奏

聞謹

奏

此奏是意見亦屬公當另有諭旨從部頒發

雍正十年十一月十九日廣東觀風整俗使

臣焦

祈年謹

奏為奏

聞事竊照廣東今年雨暘時若早稻豐登米價甚平

臣

經具摺奏

聞茲秋收告成據各屬呈報年登大有兼之嘉穀蕃生
一莖自雙穗以至七穗一本自十數穗以至一百
二十九穗自四五尺長至一丈一尺不等各該地

方文武官弁齎送呈閱前來已經督撫與臣合詞
奏

聞并函匣繪圖遣員恭

進在案且粵東地方遼濶通省亘數千里十府二州
收成分數大率如一現在天時和暖播種二麥早
已青蔥米價自六錢以至八錢九錢不等地方處
處寧謐萬民樂業所有特產嘉穀及年歲順成緣
由理合奏

聞謹

奏

覽粵東收穫情形欣慶之懷莫可言喻

同日又

奏為奏

聞事竊照香山縣依山傍海素稱積盜之區除擒撫蔴

子淇澳二村各盜共八十餘名已經督撫與

臣合

詞具

奏嗣督撫與臣復面諭該縣協用心訪查務盡根株
以仰副

皇上除盜安民之至意今於十一月十四日據香山協
副將黃錫申香山縣知縣魯遐齡報稱查張婆澳
圓山仔等處良匪不一親詣該地方宣揚

聖德天威多方招撫自八月二十七日至十月二十四
日又陸續投首林開運等共四十二名等情現俱
行司審擬在案又新會新寧等縣交界之百峰山

尤為盜藪臣與督撫密飭該文武實力緝拏除擒
撫積盜李雅拱等數十餘名之外但山深林密恐
猶有匪竊潛藏一時搜捕不到有署廣海寨遊擊
馮元實心捕盜歷著勞績前在百峰山擒撫各盜
該員出力居多今該員又於十一月初八日招撫

積盜李逢春等十二名投首前來實屬努力上進
爾即言之督臣將馮元指名題請似此出格效力之員
之員查馮元係三江口都司現署廣海寨遊擊熟
豈但實授遊擊便超擢叅將亦可
習廣海一帶水陸情形若以實授該遊擊缺似屬

人地相宜伏祈

皇上諭令督臣酌量題補實為恩便至前後擒撫各盜
或於本省酌量安插或仍照舊例分發各省現在
遵照奉到

皇上硃批督臣會同奏摺

諭旨督撫與臣密議按其情形詳加酌定另行具

奏所有香山百峰山續行招撫投首各盜緣由理合
具摺奏

聞謹

奏

覽

硃批諭旨卷一百三十四

欽定四庫全書

硃批諭旨卷一百三十五

硃批孔毓璞奏摺

雍正五年九月十七日浙江布政使

臣孔毓璞謹

奏為錢糧重任恭請

聖訓指示仰祈

恩賜摺奏事竊

臣

由揚州府知府荷蒙

皇上洪恩特授蘇松太道在任未滿一年遵

旨赴部引

見雍正五年二月二十八日獲覲

天顏三月初一日復聆

聖訓欽承

面諭近來藩臬兩司皆賜摺奏

臣跪聽

天語回任以來益思勉竭駑鈍仰報

高深茲荷

聖主格外隆恩畀以浙藩重任聞

命之下感切淪肌伏念布政司一官有旬宣責任凡地
方行止事宜均須籌畫而錢糧出入尤當慎重臣
於本年七月十九日抵任隨准陞司臣許容將一
切正雜錢糧支放起存數目移送前來現在逐一
清查核算循例具詳聽候撫臣盤察具

題外但臣稟質愚蒙見事遲鈍非仰藉

聖明指示竊恐措置失宜況浙藩錢糧頭緒甚多政務
紛繁責任綦重緣曾蒙

聖諭藩臬皆賜摺奏用敢瀆請仰懇

聖恩賜臣一例用摺則十一府屬中凡遇緩急重輕之

事皆得預請

聖訓仰體祇遵臣實叨荷

生成於無既矣荷蒙

俞允則臣摺從何上達之處伏乞

皇上批示遵行此摺未敢專人齎

進敬謹封固附撫臣李衛代為轉

奏臣不勝悚惕之至謹

奏

朕因甘肅撫臣莽鵠立軟懦不能綽然稱職而藩司又不得其人所以將汝調任汝到彼盡心協助竭力勉為之如有摺奏事件遣人齎至大學士張廷玉處交伊轉奏可也

雍正五年十一月十九日調補陝西甘肅布政使

臣孔毓璞謹

奏為叩謝

天恩恭繳

硃批諭旨事竊

臣仰荷

聖恩畀以浙藩重任因曾蒙

皇上面諭近來藩臬兩司皆賜摺奏

臣

不揣冒昧瀆懇

一體

賜臣用摺於九月十七日封交撫

臣

李衛代為轉

奏續奉

特旨調臣甘肅布政使聞

命之下隨將任內經手一切錢糧事務交清署布政司

糧儲道蔡仕舛接收訖定於十一月初六日離浙

赴任於十一月初二日接到撫臣李衛轉交原封

前摺到臣欽奉

硃批諭旨臣跪讀之下感懼交并伏念微臣毫無知識

乃蒙

聖主格外超用復量移巖疆勉以振刷並

恩許摺奏指示交進之處

臣

敢不益矢冰兢竭盡駑駘

履任之後如有地方緊要事宜自當遵

旨具摺密奏第

恩深任重圖報為難用敢再懇

聖慈特賜訓示庶得勉力遵循不致隕越謹此繕摺

奏謝所有奉到

硃批諭旨理合恭繳謹

奏

覽

目今西藏有師行之役一切備辦軍需糧餉各務協同督撫勉力經營毋怠

雍正六年二月二十七日陝西甘肅布政使臣孔毓璞謹

奏為據實奏明事竊

臣荷蒙

聖恩調任甘肅布政使於雍正六年正月十六日到蘭抵任呈請撫臣莽鵠立代為恭謝

天恩在案臣查司庫錢糧頭緒紛繁款項混淆歷任交代內有借支未清銀六百七十餘萬兩其中或因借支動用未奉部撥還款者或因原係應給兵餉先行放給而鎮營各官未造正支冊領送督撫掛發者或因承辦軍需浮冒開銷核減未定者或因墊放借支陸續扣還歸款者臣現在按款稽查實心辦理總期

國帑有著絲毫不容隱漏倘有透冒虧空情弊臣當

據實詳報督撫兩臣會疏

題叅究追完補臣查江浙兩省徵收錢糧耗羨一項

有加一者亦有不及加一者臣尚以為重當量為

減省以舒民力今查甘肅地方徵收耗羨有加一

五以至加二不等者聞係前撫臣石文焯因甘屬

當詳其屬員養廉敷用與否不可急遽更張以沽名譽

但當去其尤甚者蓋百姓受累不在些湏火耗也若能

取於此業已

令屬員不分外苛派則民間惟恐輸將之或後耳

奏明在案至臣衙門凡廳州縣衛起解錢糧歷有平

規每兩二分五釐以為養廉亦經前撫臣石文焯
奏明在案惟各省協餉原無平規而解到餉銀內間
有多餘者臣思解來餘銀並無退還之例亦不便
侵肥入已所以另設一櫃於放餉之時照依部平
彈兌將多餘之銀收貯櫃內按數登入堂簿於每
年年終將多餘之數據實

奏報歸公其州縣額徵地丁起解司庫約計一十八
萬餘兩若所屬徵解全完應有平規四千餘兩又

支放驛站俸工銀兩每百兩歷任有扣平頭銀一兩至三兩不等又有西寧稅規一千一百兩又解司雜稅銀兩每兩亦有平規二分五釐臣查驛站俸工錢糧乃

皇上額給之款豈容絲毫扣剋而稅銀一項理應儘收儘解若有贏餘儘數歸公克餉矧此項稅銀屢蒙聖主諄諄告誡寬其已往之咎開予自新之路今經手各官據實首報臣身任表率若復隱匿收受稅規

以及解稅平規何以使屬吏仰遵據實首報且臣
衙門既有州縣錢糧平規四千餘兩儘堪養廉如
有多餘尚可充作地方公用豈可通同匿稅扣剋
短給是以臣到任之後支放驛餉俸工俱照部平
實發並無絲毫扣剋相沿稅規以及解稅平規立
即屏絕臣不敢欺朦謹據實奏

聞伏乞

聖主睿鑒謹

奏

分內應得者亦無庸矯廉致令後人棘手殊非善舉於此等處必將所入所出周詳計算深知灼見後方立主見毋逞一時高興銳意裁革至將來展轉維艱復行收取及或巧設他法科斂則反成虎頭蛇尾矣凡事不可急驟速於求好惟宜徐徐勉力為之

同日又

奏為恭謝

天恩事竊

臣

前在江南揚州府知府任內失察原任霸

昌道卞之銰之子卞兆濤等家口在揚居住一案

部議照例革職荷蒙

諭旨孔毓璞白鍾山呂大雲王嵩俱從寬降三級留任

張有觀照議革職俟交代清楚後令該督撫出具考

語送部引見餘依議欽此經甘肅撫臣莽鵠立准吏

部咨知照到

臣

跪讀

聖旨感激涕零伏念

臣

本庸愚身任地方因稽察不周

致使旗人潛住

臣

咎奚辭乃荷

天恩格外優容不加罷斥自此以往惟有益矢冰兢竭
盡駑駘以圖仰報

隆恩於萬一而已為此恭摺

奏謝謹

奏

經歷斯等事後誠能愧悔日前之非可保將來永不罹
斯等叅處矣過而不改乃為下愚不移切記切記似此

吏議彰著案件固不待言舉凡從前所行所為但有不
慊於心者俱能一一省察克責求合乎是則向後何至
大違繩墨耶

同日又

奏為恭繳

硃批諭旨事竊臣前奏叩謝

天恩并繳

硃批諭旨一摺荷蒙

皇上硃批目今西藏有師行之役一切備辦軍需料理
錢糧各務協同督撫勉力經營毋怠欽此臣初至甘
肅未諳軍需事務然不敢不殫心料理以期無誤
除事件有應聽督撫二臣調度者自聽督撫行檄
調度有應斟酌詳請者悉皆詳請督撫二臣指示
遵行至臣職司錢糧一出一入固不敢苟且因循
而一舉一動亦不敢違越矩度惟有竭盡丹誠勉
圖實效以仰報

聖主天恩於永永無極耳所有奉到

硃批諭旨理合恭繳謹

奏

果如所奏甚好殫心勉力以期無忝厥職可也

雍正六年六月二十一日陝西甘肅布政使臣孔

毓璞謹

奏為據實奏明事竊查甘肅撫臣衙門養廉有茶規

一萬一千九百兩向係茶商於年終時繳臣衙門

查收轉解撫臣收用按月分算每月約計幾及千
金今年三月內撫臣莽鵠立以日用不給向臣借
支銀兩即以此項為抵續因奉

旨命撫臣前赴西寧料理軍需盤費無出又以為言臣

思撫臣養廉在臣衙門支取者只有此項既以為

抵自難執定不借隨量其每月應得之數預為通
融前後共借過銀五千兩在於庫貯雜項銀內動
給俟繳到茶規之日即行歸款臣謹據實

奏明謹

奏

不於斯等處迎合更將何事以取媚上司耶但所慮者
其間或值莽鵠立陞遷降革爾又離任卸事無項墊補
致成虧空累及身家性命之時非此奏明一摺可能倖
免也

同日又

奏為請

旨揀選廕胄以備邊省實用事竊聞致治之本在於親

民親民之官首重牧令

臣伏見我

皇上宵旰憂勤勵精圖治慎選才良以備牧民之用

命往各省試用補授亦已多員自科甲以致捐途教職
生監三考佐雜卓異保薦以及多年廢員皆蒙

特恩簡拔格外錄用

臣一介小臣何敢妄有陳

奏但邊地情形久在

聖主睿鑒之中撫循綏理不同腹裏

臣

不揣固陋妄謂

大臣子弟由廕生候補者不乏其人或以京職候補不能得缺或止在籍安居不即謁選夫以單寒新進尚爾效力邊方矧屬大臣廕胄世受

國恩更宜使之效力邊地以圖報稱查廕生一項有補員外郎及卿寺小京官并同知通判等職者在同知通判等官用者固宜外任而以員外郎卿寺小京官用者亦可改補外任令其習練民事若以原銜借補州縣試用限以三年之內循分稱職者

實授州縣准其照銜食俸再任五年供職無過准其照所帶之銜陞用內如催科得法撫字無慚有守有為治行卓越者試用三年滿日即為薦舉以本省緊要缺

題請陞用其有倚恃父兄情性乖張或辦事無能不勝州縣之任及貪酷敗檢科派厲民者分別叅劾如此則廕胄咸知自奮邊陲可收得人之效矣倘蒙

俞允仰祈

敕部確查八旗及各省未出仕廕生共計若干員行文
旗籍調取引

見分發甘省之外再撥雲貴川廣等省使之乘時出力
效用以仰報

皇上豢養深恩其於地方民生不無小補也臣謹繕摺
陳

奏伏乞

睿鑒施行謹

奏

聾瞽之說朕實難批諭

同日又

奏為恭繳

硃批諭旨事竊

臣

前奏恭繳

硃批一摺奉

聖主硃批果如所奏甚好殫心勉力以期無忝厥職可

欽定四庫全書

硃批諭旨

卷百三十五

十四

也欽此除軍需事件悉皆辦理竣事現在定限飛催
分辦各員將用過錢糧造冊聽候督撫二臣

奏報外所有奉到

硃批諭旨理合恭繳謹

奏

觀爾惟恃迎合取媚以圖容身保位大有辜負任用光
景嗣後若稍涉舞智弄巧不肯致身效力無欺無隱將
來身名俱敗何嗟及矣勉之慎之

雍正六年九月十九日陝西甘肅布政使臣孔毓

璞謹

奏為恭繳

硃批諭旨事雍正六年八月十五日臣家人齎回臣

奏明西藏用兵軍需事件悉皆辦理竣事并繳

硃批一摺奉

聖主硃批觀爾惟恃迎合取媚以圖容身保位大有辜
負任用光景嗣後若稍涉舞弊弄巧不肯致身效力

無欺無隱將來身名俱敗何嗟及矣勉之慎之欽此

臣跪讀之下感悚交集伏查臣辦理一切軍需皆

在蘭州行檄調度至預備出口驛頭餽養諸事皆係西寧道府諸員在彼辦理三月內復奉

上諭著撫臣莽鵠立就近赴西寧料理軍需撫臣臨行

囑臣將沿途經由牽驛事務照料妥當其西寧之

事我自料理無誤臣謂彼地已有撫臣料理又有

督臣委官在彼可以無誤不謂乃有不給料草奔

逸驪頭諸事迨撫臣回蘭臣曾面問撫臣云西寧諸事我已一一料理據實

奏明你可放心

臣愚以為西寧之事撫臣已經

奏明不便更有所議是以止將平番碾伯之玩誤揭報未將西寧道府並揭因致督臣岳鍾琪有徇庇之叅劾也猥蒙

聖慈復從寬宥今責

臣

惟恃迎合取媚似有大負我

聖主不次超擢之殊恩此則實非微

臣

之所敢出也

思用巧者無不成拙施於家庭猶且不可矧於

君父之前而敢肆其姦巧以自取身名之不保乎臣之

功名為我

聖主所授臣之身命猶望

聖主矜全至於致身效力無欺無隱

聖主之勉勗微臣者在斯微臣之圖報者亦在斯也犬

馬尚知報主微臣寧獨無心鞠躬盡瘁臣之分也

區區微誠伏祈

睿鑒所有奉到

硃批諭旨理合恭繳謹

奏

慎之又慎庶或保全超擢之恩不在此數句巧辭曲辯也

雍正七年六月十六日陝西甘肅布政使臣孔毓璞謹

奏為恭謝

天恩事竊查雍正六年甘省地丁正雜錢糧奉戶部全數撥充本年營驛官兵餉需錢糧現在催徵歲額難以全完不獨甘省為然而營驛餉需又係季前預發計口授食各省亦然此皆不得不為墊應之項非得已也彼時臣之不即請

題撥補者蓋慮甘省百姓疲頑一聞改撥必不肯上緊完納則逋負愈多且歲額完欠未定不敢冒昧遽請因思兵餉原為應給之項現款不足遲早可

以

題撥歸補此

臣

愚昧之見也迨至歲底清查截數不

敢復踵三四五年前司鍾保等之不請撥補致使
錢糧混淆又以撥補餉需係應督撫題請之事所
以詳請撫臣許容督臣岳鍾琪會核具

題請撥在案六月內奉撫臣許容諭知藩庫那墊兵
餉我已具摺請

旨勒限催徵奉有

欽定四庫全書

硃批諭旨

六

硃批諭旨將所奉

硃批傳示臣知臣即叩頭謝

恩伏讀再三感激涕零伏思以本年必不能全完之錢糧撥充當年必不可緩之餉需在臣實有不得已之情但既不預期詳咨又不具摺奏

聞臣之自誤一至於此臣何敢辯但邊民窮苦歲額不能全完自是實情除撫臣許容

奏後各屬又完解臣庫銀一萬七千餘兩并除已叅

各州縣虧空及蠲災銀一千四百餘兩尚未完銀
四萬八千九百餘兩臣惟有仰遵

聖旨速催徵補以清墊項外仰祈

皇上矜臣之愚昧察事之不得已

恩施格外臣之幸也所有臣奉到撫臣許容傳
旨祇遵緣由理合繕摺恭謝

天恩謹

奏

天下未有如此不得已欺隱之情國家亦未有格外施恩於巧詐官吏之理假使於初奉部文時當即奏聞朕不予以矜察則誠為不體下情之主也若言因甘肅百姓疲頑一聞改撥必不肯上緊完納云云試思密詳密奏欠戶何由而得知耶似此巧詐不實愈辨愈顯矣應作何催徵歸款與撫臣許容酌商辦理此非密市私恩遂可完結之事

同日又

奏為恭繳

硃批諭旨事竊臣家人齎回

臣恭繳

硃批一摺奉

聖主硃批慎之又慎庶幾保全超擢之恩不在此數句

巧辭曲辯也欽此臣跪讀之下惟有銘鏤肺腑感戴

天恩無欺無隱以仰副我

皇上諄諄勗勉之

恩旨而已所有奉到

硃批諭旨理合恭繳謹

奏

下愚不移與否在汝自為銘鏤肺腑與否亦在汝自省也

雍正七年十月十五日陝西甘肅布政使臣孔毓

璞謹

奏為敬陳下悃仰祈

睿鑒事竊查準噶爾之噶爾丹策零踵父逆惡悖法負

心蒙我

皇上俯允廷議命將出師以彰

天討諒此小醜計日可平

臣

於雍正六年七月內即奉

川陝總督今

特授寧遠大將軍

臣

岳鍾琪委同涼莊道今委戶部噶

蘭大殷邦翰四川遵義府知府今補陝西驛傳道

趙挺元在蘭設立檔子房公同預辦軍需事宜

臣

等仰遵

聖主不累官民之

諭旨已將一切應備物件俱殫心料理照依時估計算
分發所屬辦理製備在案而大將軍臣岳鍾琪已
於雍正七年六月二十日至蘭駐劄考核辦過軍
需事務并令將動用各項錢糧製備過料草什物
等項分析條件先造簡明冊入

奏其時星夜辦理造送而大將軍以出口之期將屆
甘涼肅三處尚須駐劄數日查考一切應用軍需

遂於七月初十日自蘭起程前往面諭臣同趙挺元在蘭辦理催趲未竣軍需其前途解送軍裝及裝運米糧炒麵駝隻兵車俱令戶部噶蘭大殷邦翰隨同料理迨至閏七月初二日臣奉大將軍臣岳鍾琪以西安置辦裝運米麵之布口袋未到及甘省之毛麻口袋以及駝隻兵車應需駕韉裝帶一切物件皆缺少未齊而趕駝夫役亦未雇備必致誤事遂行調臣前抵涼州辦理至在蘭恐有應

發軍需銀兩等事並蒙檄令兌出軍需銀五萬兩
委令甘肅按察使李世倬同驛傳道趙挺元辦理
臣隨於閏七月初三日起程沿途即稽察趕送各
項軍裝及兵車毛麻口袋等物件皆通行無誤惟
因驛站地方褊小之區雇車不出致多擁擠堆貯
而駝夫一項原皆分行所屬雇備隨後發解銀兩
本無稽誤祇緣軍需文卷紛繁俱貯檔子房在戶
部噶蘭大殷邦翰豈能攜帶前往是以每有查問

之事殷邦翰不能隨事登答所以調臣在涼承辦
臣於閏七月初七日到涼辦事於九月二十二日
回署臣查今歲軍需事已無誤惟明春尚有糧車
裝運米麵及帶解農具什物并駝隻馬匹牽拉馱
載暨押運文武員弁出口諸務在大將軍雖將明
春正二月應辦之事俱交撫臣許容會同湖北撫
臣馬會伯就近督催料理

奏明在案但軍需一切事件皆臣經手辦理甘肅撫

臣許容則以有湖北撫臣馬會伯為辦理西路軍需之員諸事未免推諉而馬會伯實則不諳軍需事多拘牽全無決斷臣恐二臣於一切軍需徒多批駁遲疑毫無裨益且自蘭至肅往返幾及三千里若遇事仍行徵臣查覆方行則緊要事件必多貽誤臣蒙

皇上特恩調補甘肅藩司料理軍需乃臣職分臣願往甘涼一帶地方就近與湖北撫臣馬會伯商酌辦

理以期無誤伏祈

聖鑒允臣所請前往辦理軍需但臣既辦軍需則藩司錢穀事務不能兼顧敢請我

皇上敕於司道內揀選代理

准臣仍帶藩司印信於雍正八年正月內即往甘涼一帶辦理其各屬軍需奏銷冊有同臣辦理軍需之驛傳道趙挺元人甚老成堪以查核俟臣事竣再為確核奏銷庶盡臣心而安臣分臣不敢不殫厥

心思以圖報效也臣曷勝惶悚待

命之至謹

奏

此奏甚屬可嘉有旨諭部矣軍需事重極當殫心竭力者倘稍有遲誤汝等身家性命關係勉為之慎為之

同日又

奏為恭繳

硃批諭旨事雍正七年閏七月二十二日臣家人齎到

臣回奏墊放雍正六年兵餉一摺欽奉

硃批訓飭并

命臣與撫臣許容酌商辦理欽此欽遵微臣咎戾已在
聖鑒之中臣固不敢巧辭曲辯但撫臣許容已將此件
具

題奉部議覆查取擅行那移之各布政使

題叅則臣更不能與許容商酌辦理矣獨是臣下有
不得已之情原許陳奏於

聖主之前臣不敢不

奏非敢再為巧辯也臣查雍正六年甘省地丁正雜
起運銀兩全撥本年兵餉臣不將民不能完情由
奏明改撥臣咎奚辭然以那移而論咎不在臣臣於
雍正六年正月十六日到任本年春季兵餉例於
季首關支而戶部

奏准預撥銀三十萬兩未經撥到彼時署布政使事
革職按察使李元英已那庫貯銀兩發給兵餉訖

臣任內所發乃夏秋冬三季兵餉皆外省協解及本省徵解起運銀內正收正支臣於改撥詳內只將三四五六等年兵餉借墊未清請

題撥補以清年款其六年墊放銀兩臣原不曾分析

何季為墊項何季為正支今部查那移之員則臣之於雍正六年三季兵餉全係外解協餉於本省地丁皆有收放月報冊造送督撫二臣衙門可稽而李元英之借放兵餉於清查司庫交代錢糧事

案內經臣詳請前撫臣莽鵠立

題報有案至於從前各布政使那墊三年餉銀則係
布政使彭振翼署司陸賜書四年則係布政使鍾
保五年則係鍾保及署司李元英六年墊放春餉
亦係李元英但據鍾保移覆伊任內曾將雍正三
四年地丁正雜全撥兵餉彭振翼陸賜書鍾保皆
有墊項雍正五年復又全撥難免那墊詳請前撫
臣石文焯以地丁歲內難完

題請改撥將雍正五年兵餉另行改撥六萬兩并請
嗣後本省銀兩乞撥七留三經戶部議覆以雍正
五年正月內臣部摺奏甘肅係邊遠省分循照雲
南貴州四川三省之例每年預撥銀三十萬兩以
充下年兵餉摺奏奉

旨准行欽遵知照在案應將改撥及撥七留三之處毋
庸議則鍾保原請改撥有案而從前那墊民欠之
彭振翼陸賜書鍾保均未加以處分前案足稽也

臣之請撥實為清理錢糧起見但撫臣已經具

題則應聽於

題案內完結惟是臣遭逢

聖主拔擢至此不得不將此下情瀝陳於

皇上之前自認不預先

奏明之罪實非敢巧為支飾也臣現將此案備悉叙

明通詳請

題伏祈

聖慈垂鑒施行所有奉到

硃批諭旨一并恭繳謹

奏

朕用人行政惟一主於大公果自問無疵斷無橫被冤抑之理若反身有愧縱極巧辭支飾亦不能倖免也試看自知

雍正八年三月二十日署甘肅布政使協辦軍需

臣孔毓璞謹

奏為敬陳辦過軍需事宜仰祈

聖慈睿鑒事竊臣一介庸愚過愆頻仍荷蒙

天恩格外矜全著臣來京另有用處又以葛森現辦噶

斯軍需復令臣署理司篆既奉另用之

聖旨復沛署事之

殊恩小臣何幸恭逢

異數嗣又接到戶部照會欽奉

上諭因臣願往甘涼一帶地方就近與湖北撫臣馬會

伯等辦理軍需

允臣所請帶布政使印信前往甘涼地方協同許容馬
會伯悉心辦理務期和衷共濟裨益軍務其甘肅
布政使事務著許容揀選賢員奏

聞署理欽遵轉行到臣伏念臣自到任辦理軍需兩載
以來見寧遠大將軍臣岳鍾琪持躬敬慎待屬嚴
明凡辦事件必條議款項

奏請

聖主允准方始令臣辦理是以無事不有成規臣得有
所遵循或間有未明者必具詳稟請示明白如有
舛錯可以隨事更正無誤初非愚臣之自能熟諳
也惟是大將軍臣岳鍾琪慎重

國帑諸凡惟恐糜費錢糧皆從省便處辦理我

皇上軫恤官民不惜多費皆令從寬裕處辦理因大將
軍領兵出口慮督撫諸臣彼此猜疑推卸是以

特簡兵部尚書臣查弼納戶部侍郎臣常德壽原任巡

撫臣常賚前至甘肅稽察軍需又派出戶刑二部
賢能司官滿漢各三員隨往任使諸臣仰體

聖懷無事不從寬裕處辦理其所以裨益軍務者無窮
今七千輛糧車已全數出口臣謹將辦過事宜另
摺分析備陳於

聖主之前為此繕摺奏

聞伏乞

睿鑒謹

奏

將所奏辦過事宜原摺發交該部錄存俟查弭納等題
奏到日查明有旨

同日又

奏為恭繳

硃批諭旨事竊臣家人齋回臣請往甘涼一帶地方就

近與湖北撫臣馬會伯商酌辦理軍需一摺欽奉

硃批諭旨臣跪讀之下仰見我

皇上俯鑒微忱獎勉兼施臣自顧何人遭逢

異數臣雖愚昧敢不和衷共濟竭力報效以副

聖懷今糧車七千輛已於三月二十日全數裝運出口

照寧遠大將軍臣岳鍾琪所定程途計四十日可

抵軍營其駱駝約計六千隻亦照大將軍檄行分

為三四兩月出口至甘涼寧西所辦羊隻俱於三

月內各從該地方起程其甘涼寧三處羊隻由肅

州出口西寧則從本處出口由赤金湖花海子直

送軍營至口外郭壁應餵羊料豆已經部臣查弼
納等行令趙挺元詳撥臣現在催令輓運至肅雇
車轉運臣俟料理四月馱送糧麵之駝隻出口則
軍需已竣臣於五月底六月初旬可回蘭州矣惟
是臣有下情不得不預為

奏明以求

睿鑒者臣前奉

上諭俟葛森到任之日孔毓璞來京另有用處欽遵在

案今噶斯軍需正當辦理葛森未能到任而臣先以請往甘涼等處辦理軍需奉

聖恩允臣帶印前往辦理其甘肅布政使事務著撫臣許容揀選賢員奏

聞署理經撫臣許容

奏委陝西驛傳道趙挺元署理臣於起程之日即報離任因趙挺元未曾到蘭隨將臣任內經手錢糧先造簡明清冊交與按察使李世倬轉交其細款

冊籍亦已造齊現在核算交代已無不清臣回蘭
之後自應專心料理進剿準噶爾一案軍需銷算
冊籍恐撫臣令臣仍行接署與葛森交代而甘肅
布政使事務殷繁臣自正月初四日起程至回蘭
時計將半載以隔手日久之員重理繁劇之事勢
必過愆頻仍竊恐有負我

皇上特賜矜全之德意況此案軍需甘省用銀已至三
百八十餘萬兩臣應悉心清算造冊詳請

奏銷以免浮冒舛謬之弊奈頭緒紛紜清釐非易以
臣駑鈍只可料理銷算難以仍任藩司事務貽誤
政事愈增愆尤也仰懇

皇上隆恩俯允降

旨將甘肅布政使印信

諭交趙挺元俾與葛森交代免臣再為接署并令趙挺
元督責經手經承與臣料理銷算軍需錢糧俟冊
籍造就仍交趙挺元用布政司印分呈核

奏以全始終同辦軍需之誼庶軍需奏銷早竣而臣
亦來京有日矣臣謹恭繳

硃批諭旨理合一并

奏請曷勝悚惶激切待

命之至謹

奏

此奏業交廷臣議覆今將所議發來汝看司事不必接
署已照請行印篆暫勿交出恐無印則呼應不靈也廷

議是

同日又

奏為恭繳

硃批諭旨事雍正七年十二月十三日臣家人齎回臣

恭繳

硃批諭旨回

奏墊放雍正六年兵餉撫臣許容已經具

題臣惟有自認不預先

奏明一摺奉

皇上硃批朕用入行政一主於大公果自問無疵斷無橫被冤抑之理若反身有愧縱極巧辭支飾亦不能

倖免也試看自知欽此臣謹仰遵
無過認過亦非也總不領會朕意奈何
聖旨惟有自認過失不敢文飾已非所有奉到

硃批諭旨理合恭繳謹

奏

覽

雍正九年四月初九日都察院左副都御史辦理
軍需臣孔毓璞謹

奏為奏明照前辦理軍需以專職守事竊臣自蒙

聖恩允臣辦理軍需以來惟有黽勉辦公並無寸長裨
益感蒙

聖慈將臣

擢置卿班仍著在肅州辦理軍需業經另疏

奏謝外伏念臣辦理軍需原為承上接下之總匯凡

奉行事件有未明晰者則通詳請示而行有奉行
查議者則量其事之輕重細加叅酌如事理已經
明晰無有疑議者則隨時即覆如事未允當須廣
集衆思者即行道府確議俱令刻期詳覆務求允
協而無遲滯固不敢因循怠玩也今臣叨荷

特擢仍駐肅州辦理軍需舉凡應行應議及應請示商
酌事件仍照從前辦理不敢以奉

旨優陞之故偷安諉却貽誤公事至應行具

奏請

旨及應咨部備查事件仍聽督臣查郎阿撫臣許容酌

定

題咨

臣未奉

聖旨不敢越俎干預臣謹據實

奏明庶事有專任而無岐誤矣伏祈

睿鑒謹

奏

若感目今超擢之恩及思將來功名事業之不可量豈但仍照從前辦理而已當倍加黽勉不遺餘力方為善能循分盡職

同日又

奏為奏明運務事竊臣於雍正八年奉文承辦應運軍營駐歇一年口糧除口外屯田收穫糧內辦供麵四百萬觔口內應運粳粟米三萬二百餘石小麥青稞辦磨白麵炒麵五百一十三萬八千三百

餘勛自雍正八年八月十六日運送起至雍正九年四月中旬俱可全運出口訖至今歲督臣查郎阿

奏准增辦粳米一千石粟米二萬石青稞一萬石小麥五千石料豆一萬石經撫臣許容具

奏派撥並將免撥西寧青稞七千石在於上年豐收之甘涼所屬採買抵補暨續又增撥料豆一萬石以上糧料據各屬俱於正二兩月前後運至涼州

經寧遠大將軍臣岳鍾琪督臣查郎阿議定由涼
州之武威永昌甘州之山丹張掖肅州之高臺等
縣遞運至肅其沿途管押仍係各屬原委之員役
料理押送赴肅交收除各府州縣原運車戶內有
情願長運至肅州者聽其長運其餘俱皆遞運蓋
車戶里民感戴我

皇上愛養黎民歷次蠲免錢糧之

殊恩而運腳較前增加寬裕無不踴躍爭先所以運務

甚速即當農務正殷之時有原以趕車裝載營生
之運戶以及農民家有餘牛牲畜車輛情願領運
者皆聽其自便自三月至今將米麵料豆已源源
運到肅州現在即可料理轉運出口矣所有駐歇
一年口糧全數起運並續撥糧麵現在起運及農
工無誤緣由理合一併奏

聞謹

奏

據奏起運情形欣悅覽焉

同日又

奏為欽奉

上諭事竊臣接到甘肅撫臣許容鈔錄大學士公馬爾賽等寄字內開雍正九年二月二十二日奉

上諭陝甘二省年來辦理軍需雖皆動用正項錢糧民間無絲毫之費然輸輓糧運伺候差徭不無勞苦朕已另降諭旨加恩獎勉但必得地方大吏能仰體朕

心凡一應料理軍務固不可任其遷延遲緩而過於
迫急又未免擾民其查核錢糧固不可聽其浮冒開
銷但過於苛刻則必致剝民督撫大員若嚴緊一分
則州縣官必於百姓加緊一倍如能寬容一分則小
民即得一分之惠許容孔毓璞辦理西路軍需亦各
盡心竭力但許容失之細刻州縣懼其核減恐不能
照時價付給則百姓不無虧折孔毓璞失之匆迫州
縣懼其催促必不敢少緩須臾則閭閻未免驚擾此

皆太過之弊也爾等可密寄信去凡承辦州縣或於
原限之外遲緩無多而其人之才有可用者不妨畧
寬容之其開銷物料脚運之費亦必準酌時價不可
十分核減但朕此旨不可宣示於人恐有不肖之州
縣借此推諉遷延虛開浮冒其漸不可長也許容孔
毓璞但時將朕旨密記於心辦理諸務自無太過之
弊欽此遵

旨寄信前來等因到臣微臣跪讀

訓旨實切悚惶繼今而往惟有時遵

聖諭密記於心惕厲黽勉不敢遂過飾非再有匆迫復

蹈太過之弊以仰副

聖主諄諄教誨之至意所有微臣凜遵

聖訓緣由理合繕摺奏

聞謹

奏

實力遵奉務合適中之道

雍正十年二月二十日都察院左副都御史辦理
軍需臣孔毓璞謹

奏為仰懇

聖恩賜臣摺匣以期慎重事竊臣荷蒙

天恩高厚命臣辦理軍需從前一切應

奏事宜俱用夾板包封專差家人恭

進往回既需時日而夾板亦難嚴謹伏思臣身膺重

任而才復庸下必得恭聆

聖訓庶幾有所遵循若仍用夾板齎

呈則途中既有耽延之慮又難保無洩漏之虞似非
所以重軍需而慎機務也可否仰邀

聖恩賜臣摺匣除與督臣查郎阿等會

奏事件仍在督臣摺匣會奏外其或臣有應

奏事件用臣摺匣照例由

御塘恭

進則密奏事宜恭請

訓旨可以迅速而慎密矣臣不揣愚昧冒瀆

聖聽伏祈

皇上睿鑒謹

奏

摺匣賜來矣毋得輕易騷擾驛站如有應奏要事方由御塘齎呈仍隨同查郎阿等奏摺附進可也

雍正十年七月二十三日總理屯田諸務都察院左副都御史臣孔毓璞等謹

奏為酌議口外屯種以省糧運事竊照口外靖逆赤
金安西柳溝等處屯種地畝一案臣等於雍正十
年正月二十一日復會同商酌繕摺奏請於二月
十七日准戶部咨大學士鄂爾泰等議奏應如所
議將口外地畝通行清查除戶民墾熟之地仍給
戶民管業照例陞科外其客民私種者分別已未
下過籽種給與籽種及價值銀兩仍令伊等承種
并給工食口糧其牛犁器具等項亦即確查給價

添補如客民內有不願傭工者亦量給以從前開墾之費使之別營生業客民如不敷用亦應如所議在於莊浪土司屬下雇募土民赴口外耕種按年給以口糧工價仍於農隙令其刈割草束備用至應墾地畝現在委員查勘應俟查明之後將應需籽種牛具並雇募客民土民所需口糧工價各數目逐加確核造報其開墾諸務令孔毓璞總理查郎阿二格公同酌辦其分理墾種之員查郎阿

等一面委用一面奏

聞并量給盤費俟一年後將各員效力勤惰分別等次具奏等因奉

旨依議欽此欽遵在案嗣據委員候選知州丁祐吉等分路清查安西衛屬之大灣小灣等處柳溝衛屬之踏實堡雙塔堡卜隆吉等處赤金所屬之惠回堡火燒溝上赤金等處靖逆衛屬之紅柳灣頭道溝等處將員弁客民私墾地畝逐一造冊呈報前

來臣等會商酌辦因時屆春耕亟需佈種隨即委
員分行監理并將所需牛犁農具夫役籽種口糧
等項即行備辦其閒曠之地酌量地土膏潤水漿
足用無礙民田者即派撥夫役及時開墾下種臣
孔毓璞亦即赴口外親詣各處查勘隨地開示委
員務令詳慎辦理計員弁客民并新墾田地共下
過籽種三千四百三十九石零約計人工牛犁各
項所費合之臣等原奏每下籽種一千京石一年

所需幾及二萬兩之數亦約畧相同此係第一年
試種若至第二年則牛犁器具止須添補又可減
省至閏五月間臣孔毓璞又往口外各屯種地方
巡查一遍留心察訪凡分理屯種各員俱能竭
辦理至各種禾稼情形仰賴我

皇上聖德格

天風調雨順水澤充盈莫不發榮滋長秋成在望豐稔可
期所有酌定事宜謹備細臚列另摺恭呈

御覽伏祈

睿鑒謹

奏

詳覽屯種各事宜朕深為嘉悅

雍正十一年正月初六日總理屯田諸務吏部右

侍郎臣孔毓璞謹

奏為恭報徵臣出口日期事竊臣荷蒙

聖恩專司屯務自應移駐口外方可就近經理已將駐

劄靖逆緣由

奏明在案今東作將興臣於雍正十一年正月初六日自肅起程出口前赴靖逆駐劄稽查瓜州屯墾疏濬事宜並經理各處屯種要務所有微臣出口日期理合恭摺奏

聞謹

奏

親詣屯所督理稽查方與諸務有益也出口之行愈早

愈好

雍正十一年六月初二日總理屯田諸務吏部右侍郎臣孔毓璞等謹

奏為報明口外屯種數目并禾苗長發情形事竊查口外屯田先經臣等將今年應下籽種數目及安西衛屬之大小灣地畝停止下種使水全注瓜州緣由奏

聞在案今臣孔毓璞遍歷各衛所履畝查勘新舊墾種

地畝下過籽種五千六百餘石及瓜州新墾處所
下過籽種三千五百石二共下過京石籽種九千
一百餘石俱已長發茂盛吐穗秀實關外兵民交
相稱慶是皆由我

皇上敬

天勤民精誠感格以致口外雨少之地本年亦時沛甘霖
優渥霑足入夏以來水澤充裕如法灌溉將來豐
稔可期臣恐上廩

聖懷合將禾苗長發情形先行恭摺

奏報再查前項下過籽種地內有靖逆衛屬之頭二
三道溝王全臣新墾地一千石內間有潮鰾上升
禾苗尚未生發者俟秋成之後另當設法開墾地
畝更換理合一併奏

聞謹

奏

覽屯田內下過籽種數目及長發茂盛情形朕懷深慰

欽定四庫全書

碑批諭旨

四

硃批諭旨卷一百三十五